



# Na otpadu roba vrijedna 500.000 KM

U akciji Čarli privedeno više osoba, među kojima i dva pripadnika UIO, osumnjičenih za nezakonit uvoz vozila

U ilegalnom skladištu na autootpadu u Velikoj Kladuši jučer je pronađena roba vrijedna 500.000 KM, koja se trebala prodati na crnom tržištu u BiH. Ovo su prvi rezultati akcije kodnog naziva Čarli, koju su po naredbi Suda i Tužilaštva BiH izveli službenici UIO BiH i SIPA.

Iz UIO su naveli da je u akciji učestvovalo 20 službenika iz Sektora za provođenje propisa, koji su bili raspoređeni na izuzimanje dokumentacije iz četiri špediterske kuće koje su provodile carinske postupke uvoza putničkih motornih vozila koja su carinjena u Carinskoj ispostavi Velika Kladuša.

- Sumnja se da je u carinskim postupcima umanjivana vrijednost vozila koja je predstavljala osnovicu za naplatu uvoznih dažbina, te su tako naplaćene manje uvozne dažbine od zakonski predviđenih u postupcima carinjenja ovih vozila, precizira se u saopštenju UIO.

S tim u vezi su na ispitivanje privedena i dva službenika UIO zaposlena u Carinskoj ispostavi Velika Kladuša.



Autootpad / ILUSTRACIJA

Osim umanjivanja vrijednosti prilikom uvoznog carinjenja, sumnja se da su određene osobe privremeno uvozile vozila iz inostranstva sa stranim tablicama, zatim ih ostavljale na autootpadu, skidale strane tablice i vozila odjavljivale u inostranstvu, dok su se ona prodavala u dijelovima na crnom tržištu, čime

je oštećen budžet jer nisu plaćane dažbine na uvoz vozila.

Osim službenika iz Sektora za provođenje propisa UIO, na terenu su bili i inspektori iz Sektora za poreze koji su bili zaduženi za popis zaliha i provjeru knjigovodstvenog stanja kod poreskog obveznika iz Velike Kladuše.